



Expediente IET: P-21-193
Proxecto: Parque eólico Campo das Rosas
Concellos: A Estrada, Cerdedo-Cotobade e Campo Lameiro
(Pontevedra)
Promotor: Naturgy, S.L.U.

INFORME DE IMPACTO E INTEGRACIÓN PAISAXÍSTICA

De acordo co artigo 37.1 da Lei 21/2013, do 9 de decembro, de avaliación ambiental, e co artigo 11.3 da Lei 7/2008, do 7 de xullo, de protección da paisaxe de Galicia, con data do 20/10/2021 a Xefatura Territorial de Pontevedra da Vicepresidencia Segunda e Consellería de Economía, Empresa e Innovación, somete a informe do Instituto de Estudos do Territorio (IET) a documentación do proxecto Parque eólico Campo das Rosas.

1. Antecedentes:

Con data do 26/05/2021 o Instituto de Estudos do Territorio emitiu un informe sobre este proxecto, no marco do procedemento de avaliación de impacto ambiental ordinaria. Nese informe indicábase que o estudo de impacto e integración paisaxística (EIIP) elaborado non se axustaba ao disposto na Lei 7/2008, do 7 de xullo, de protección da paisaxe de Galicia, e no seu Regulamento. Así mesmo facíanse unha serie de consideracións sobre distintas medidas que debería adoptar o proxecto para minimizar os impactos e acadar unha mellor integración paisaxística.

Posteriormente, con data do 09/07/2021 o IET emitiu un informe no que se solicitaba unha análise máis detallada da incidencia visual dos aeroxeradores sobre elementos de interese recollidos no Catálogo das paisaxes de Galicia, e se indicaba que, de ser o caso, deberían adoptarse medidas para minimizar os impactos.

A documentación achegada pola Xefatura Territorial de Pontevedra é a contestación da empresa promotora ao informe do IET do 09/07/2021.

2. Marco legal:

Consonte co artigo 15 da Lei 1/2021, do 8 de xaneiro, de ordenación do territorio de Galicia, e co artigo 28 do Decreto 244/2011, do 29 de decembro (modificado polo Decreto 42/2019, do 28 de marzo), o Instituto de Estudos do Territorio (IET) é o órgano competente para emitir este informe en materia de paisaxe, de acordo co que para tal efecto establecen os artigos 32 e 33 do Regulamento para o desenvolvemento da Lei 7/2008, do 7 de xullo, de protección da paisaxe de Galicia (Decreto 96/2020, do 29 de maio).

En desenvolvemento da Lei 7/2008 aprobáronse o Catálogo das paisaxes de Galicia (Decreto 119/2016, do 28 de xullo) e as Directrices de paisaxe de Galicia (Decreto 238/2020, do 29 de decembro).

De acordo co artigo 11.1 da Lei 7/2008, todos os proxectos que deban someterse a declaración de impacto ambiental deberán incorporar no estudo de impacto ambiental un estudo de impacto e integración paisaxística (EIIP), como documento específico no que se



avaliarán os efectos e impactos que o proxecto poida provocar na paisaxe e as medidas de integración paisaxística propostas. O contido do EIIP debe axustarse ao disposto no artigo 11.2 da Lei 7/2008 e nos artigos 26 e seguintes do Regulamento da Lei 7/2008.

3. Informe:

No documento de contestación da empresa promotora analízase a afección visual do parque eólico sobre o lugar de interese paisaxístico (LEIP) Casa de Monteagudo e sobre o miradoiro Alto das Quintas, mediante o cálculo de cuncas visuais co apoio de fotografías tomadas en campo e distintas infografías.

No caso do LEIP, a análise efectuada conclúe que se ben é certo que dende algúns puntos serán visibles parcialmente as infraestruturas, a distancia existente e a presenza de masas arbóreas mitigan en parte a visibilidade dos aeroxeradores. En todo caso, a empresa promotora manifesta a súa disposición a implantar pantallas vexetais, como medida mitigadora para reducir a visibilidade dende este lugar, de acordo cos propietarios dos terreos onde se determine a execución das mesmas.

Respecto ao miradoiro Alto das Quintas serán visibles os aeroxeradores do sector norte do parque. A incidencia visual producirase sobre as vistas que se abren cara ao suroeste do miradoiro. En todo caso, as afeccións non serán moi significativas dado o baixo número de máquinas visibles e posto que se trata dun lugar con vistas panorámicas de 360º comprendendo unha maior superficie visible en dirección norte e noroeste.

Así mesmo, expóñense as razóns polas que resulta inviable unha localización alternativa para os aeroxeradores do parque baseándose en condicionantes técnicos, administrativos e ambientais.

Por conseguinte, poden considerarse suficientes as aclaracións achegadas pola empresa promotora en relación ás cuestións formuladas por este departamento. O EIIP do proxecto, cuxo contido complétase coa addenda presentada, axústase ao disposto no artigo 11.2 da Lei 7/2008 e nos artigos 26 e seguintes do Regulamento da Lei 7/2008.

En todo caso, lémbrese que de acordo co artigo 30.3 do Regulamento da Lei 7/2008, as medidas de integración paisaxística deberán quedar oportunamente recollidas no proxecto.

José Luís Álvarez Vicente
Xefe do Servizo de Planificación da Paisaxe

José Antonio Serantes Barbeito
Director do Departamento Técnico de Estudos

Visto e conforme, Enrique Luís de Salvador Sánchez
Director do Instituto de Estudos do Territorio

(Na data da sinatura electrónica)

